



Шочмо эл, порылык да чын верч!

Б У Д Ъ Г О Т О В /

6-шо (3757) №,
2026 ий 13 февраль,
кугарня



0+

1933 ий 1 февраль годсек лектеш.

Шинчымашым тергыше пайрем



Аделина Петрова (Морко, Унчо),
Айзиля Кадырова (Параньга школ), Вероника Березина
(Параньга, Матародо), Валерия Волкова (1-ше №-ан
Шернур школ), Макар Зайцев (Килемар, Иүксәр).

Школышто тунемше-влак уш-акылыш-тым всероссийский олимпиадыште ий гыч ийыш тергат. Кызыт түрлө предмет дене республикысе йыжын эртаралтеш. 10 февральыште Марий кугыжаныш университетышке 130 наре ўдыр-рвезе шочмо марий йылме да литератур, татар йылме да литератур, кугыжаныш марий йылме, Марий Элыште илыше калык-влакын историйышт да тўвырашт дене олимпиадышке погынен.

Түрлө школ гыч толшо тунемше-влак уш-акылыштым тергаш да сеныше радамыш лекташ чот ямдылалтыныт. Иктышт регионсо йыжыгыш икымше гана логалыныт гын, весышт ий еда сай лектышым ончыктат. Теве 1-ше номеран Шернур школышто 11-ше классыште тунемше Валерия Волкова Йошкар-Олаште эртаралтше олимпиадыш кумшо гана ушнен.

– Школыштына марий йылмым кугыжаныш йылме семын тунемына. Но мый эреак шочмо марий йылме дене олимпиадыш ушнем. Сай шинчымашым ончыкташ манын, шке гыч ятыр ямдылалтман. Марий йылмым туныктышо Лилия Владимировна Волкова кугу польшышым пуа. Ымаште регион-влак кокласе олимпиадыште кумшо верым сенен налынам ыле. Тений эше кўкшырак лектышыш шуаш шонем, – ойла Валерия.

Олимпиадым торжественно почмаште Марий Элысе образований да науко министрын алмаштышысе В.Г.Гаврилова, МарГУ-н образований паша шотышто проректоржо Э.М.Воронцова ўдыр-рвезе-влакым саламленыт да сенымашке шуаш тыланеныт.

Катя СЕРГЕЕВА.
Авторын фотожо.



Эн сай пөлек –
книга.



3-шо лаштык



Эртыме корным
лач йолгорно
ушештара.

4-ше лаштык



Йоча-влак
коклаште
умылыды-
маш молан тарвана?



5-ше лаштык



Российысе увер

Теле пагытым те кузе
ужыда? «В объятиях зимы
2026» конкурсышко ушныза да
ты йодышлан вашмутым пуыза.
Келшыше тангасым ойырен,
усталык пашам ямдылыза да
21 февраль марте колтыза.
Кумданракын – art-ptica.ru
сайтыште.

«Есть такая профессия –
Родину защищать!» конкурсыш
Шочмо элым аралышын
кечыжлан пӧлеклалтше усталык
паша дене ушнаш лиш.
Йодмашым 28 февраль марте
колтыман. Тұрыс увер – союз-
культура.рф сайтыште.

Самырык шанчызе-влак
Всероссийский Суворовский
конкурсышто уш-акылыштым
31 март марте терген кертят.
Конкурсын тўнҥ темыже:
«Россия – путь на Юг». Тичмаш
увер – suvorovmuseum.ru
сайтыште.

Марий Элысе увер

20 февральыште Марий
кугыжаныш университетыште
«Lingva - Территория»
республикысе йылме
фестиваль эртаралтеш.
Шочмо йылмын
тўнямбал кечыжлан
пӧлеклалтше пайрем
12 шагатлан тўналеш.

Звенигово район
Поянсола тўналтыш школ
йоча серызе Василий Орловын
110 ияш лўмгечыжлан
пӧлеклалтше «Моя марийская
земля» усталык конкурсым
эртара. Йодмашым
20 февраль марте колтыман.

Республикысе марий
тўвыра рўдер «Изи гармоньчо»
конкурсым Йошкар-Олаште
21 мартыште эртара.
11 шагатлан усталык конкурс
лиеш, а 16 шагатлан Ленин
лўмеш тўвыра полатыште
Гала-концерт тўналеш.

Россий – икоян кугу еш

«Знание» Россий обществен эр-
тарыме «Россия – семья семей»
марафонжо Россий калык-влакын
икоян улмо идалыклан тўнал-
тышым пыштен. 5 февральыште
Москошто «Россия» националь-
ный рўдериште тўрлӧ калыкын
икшывышт-влак погыненыт. Те-
лемост йӧн дене пайдаланен, пай-

ремыш 89 регион ушнен. Марий
Элыште илыше-шамыч Йош-
кар-Оласе Калык-влакын кел-
шымаш пӧртышкӧ чумыргеныт
(**снимкыште**). Хороводыш рўж шо-
галын, марий, руш, татар калык
куштымашлам ончыктеныт.

Оля **МОШКИНА**.
Авторын фотожо.

Увер



Юл кундем федерал округысо
«Театральное Приволжье» йоча да
самырык театр коллектив-влак фес-
тивалын Марий Эл Республикы-
се йыжынже иктешлалтын. «Йоча
театр коллектив-влак» тангасыште
Волжск оласе лицейын «Синяя
птица» школ театрже сенгышыш
лектын. Нуно «Петя и Волк» спек-
таклым ямдыленыт. Театрын вуй-
латышыже – Л.А.Кирилловская.

Волжский райо-
нысо Памар тўвыра
пӧртын «ПоролИ»
театр коллективше «Самырык театр
коллектив-влак» номинацийыште
ойыртемалтын. 15-18 ияш ўдыр-рве-
зе-влак Е.А.Кудрявцеван «Вода чув-
ствует» пьесыж почеш шындыме
спектаклым ончыктеныт.

Фестивалын сенгышыже-ша-
мыч 27 мартыште пале лийыт.



Ончылно улына

«Движение Первых» толкынын
первичный отделений-влак кокласе
всероссийский конкурсын икымше
модмашыже мучашлалтын. «Пер-
вые в науке» тангасыште мемнан
школ команде (**снимкыште**) призёр
радамыш лектын. Атом промыш-
ленность кечылан пӧлеклалтше
пайремым эртарыме дене ойырте-
малтынна. Йолташем-влак дене Рос-
сийысе атом промышленностьын

эртыме корныжым шымленна.
Мероприятийым тўрлӧ модмаш да
мастер-класс дене сӧрастаренна.
Тыршымынам жюри кўкшын аклен.
Моткоч йывыртенам. Конкурсын
вес модмашышкыжат тыгак икой
дене, келшен ушнена гын, сенгы-
машыш шуына манын ўшанем.

Игнат **ГАВРИЛОВ**.
Морко, Нож-Ключ.
Фотом школ архив гыч налме.



Пүсө уш-акыл сенымашым конден

25 январьште чатлама йүштö ыле гынат, Волжский округ Карай школыш тарванышна. Тушто Портышкем пайрем радамыште «Мунло» уш-акыл марафон эртаралтеш. Таңасымашке куд команде ушыш: Юлсер вел гыч кумыт, Провой кундем гыч икте да Морко район гыч кокыт. Марафонышто ныл турлие: «Марий Элын чапланыше енге-влак», «Марий йылме да литератур», «Марий йўла» да капитан-влакын таңасымашышт. Зеленогорск школын коман-

дыштыже 9-ше классыште тунемше-влак Анастасия Назарова, Александра Демакова, 8-ше класс гыч Ксения Демакова, Даниил Иванов да Варвара Петрова (снимкыште) уш-акыл писылыкштым ончыктышт. Командын капитанже Анастасия чыла йодышлан раш вашештыш. Модышым иктешлымек пале лие: Зеленогорск школын командыже икымше верым сенен налме.

*Миральда ВОРОБЬЁВА.
Морко район.*

Фотом школ архив гыч налме.



«Айболитыш» вашкем

Арын школышто түрлө кружок пашам ышта. Иктыже — «Айболит».

Тудым Елена Викторовна Семенова вуйлата. Мый урок деч вара арняште кок гана «Айболитыш» вашкем. Туныктышына таза илыш-йўла, чын кочкыш-йўышым ойырымо да тулеч моло нергенат каласкала. Елена Викторовнан меди-

цине аланыште пашам ыштыме опытшат кугу, шуко примерым конда. Мыланем практический занятий-влак келшат. Кызыт сусыргымо годым икымше полышым пуаш тунемына (снимкыште). Тыгай шинчымаш илышыште эре күлеш.

*Ярослав ИЛЫН.
Морко район.*

Фотом школ архив гыч налме.

14 февраль – Книгам
пöлеклыме тўнямбал кече.

Вашталтен лудына

«Книгам лудыч – весылан кучыкто», – тыгай ўжмаш почеш ятыр вере акций-влак эртаралтыт. Школлаште, книгагудылаште, кевытлаште шкешотан шöрлыкым келыштарат. Кумылан кажне енлан тушан йöратыме книгажым пыштен кодаш темлат. А олмешыже келшыше вес савыктышым налаш лиеш. Советский район Ронго школышто ты акций ойыртемалт-шын эртаралтын.

– Тунемше-влак книгаштым кагазеш пўтыралыныт. Тыге авторын лўмжым да вуймутым шылтеныт. Ты савыктыш нерген икмыняр ойлончым возен коденыт. Лудшо-шамыч книгаште мо нерген ойлалтмым палыде налыныт. Тиде йоча-влаклан моткоч келшен, – ойка директорын воспитаний шотышто советникше Э.Х.Смирнова. – Книгам пöлеклыме кече ваетш «Подари книге вторую жизнь» акцияымат эртаренна. Кумылан-влак школ книгагудылан ятыр пöлекым ыштеныт.

– Икте-весе дене книгам вашталтен лудмаш моткоч оңай улмаш. Тыге ме икаланна у, пайдале произведенийым муынна. Адакшым пырля тунемше-влак нерген кумданрак пален налынна: могай жанрлан кумылан, йöратыме геройжо кө да молат. Кеч-могай книгам аныклен кучылтман. Шкаланнат, вес йочаланат кидыш налаш куанле лийже, – маньт 5-ше классыште тунемше ўдыр-влак Мариэлла Волкова, Алёна Мосунова, Ольга Булыгина. Нуным снимкыште уждыа.

Оля МАЙКОВА.

Фотом школ архив гыч налме.





Шенгел урем

Мый Пөтъялыште илем. Тудо сылне верыште, курык аркаште, верланен. Ялыште икмыняр урем уло. Тушто поро кумылан, весела калык ила.

Шкенан уремын историйже нерген йоча-влаклан палдарынем. Тудын лумжат онгай – Шенгел урем. Шукерте ожно шуко шочшан еш гыч кугурак эрге, ешым погымек, посна илаш лектын. Тыгай еш-влакым чодыраш илаш колтынешт улмаш. Чодыра покшелсе верже Нурнер маналтын. Тушко еш-шамыч каяш келшен огытыл. Кугу урем шенгелне пасу лийын. Тушан пörтым чонаш туналыныт. Вес уремла гычат тушко посна лектыныт. Пасу ваштареш коремыште яндар памаш йоген. Еш-влак, ший гай вудлан куанен, корем сереш мончам чоҥеныт. Теве тыге мемнан Шенгел уремна шочын.

*Петя ЦУРКАН.
Волжский, Пөтъял школ пеленысе
Йоча усталык пöрт.*

Ялем


Шочмо мланде, шергакан ялем, Моктем тыйым, сылне Караем. Тый эн чапле да мотор улат, Чапмурем йонга тачат тылат.

Кумылемым кечын савырет,
Поян кожерет ден куэрет.
Шыматен ялемым ончалам,
Тыште моткочак ласка мылам.

Йöратем мый шочмо кундемем,
Лыплана тышан изи чонем.

Шочмо ял –
элемын ик ужаш,
Россий кукшытыш
мемнам уша.

*Елена
ВСЕЕВА.
Волжский округ.*



Кажне ешын йöратыме вершöржö уло. Тушто тудо шочын-кушкын, пöртгöс деч вий-куатым налын, икымше йолтошкалтышым öрын-лöдын ыштен...

Советский районын шочмо кечыже вашеш Михайловка ялысе книгагудын пашаенже Светлана Вячеславовна Моторова кандашымше классыште тунемше йоча-влаклан онгай экскурсийым эртарен (снимкыште). Ты кундемыште лийше Веденевск ял нерген каласкален. Таче кечылан ты ял йо-

мын. Олмыштыжо шудо кушкеш. А ожно тыште илыш шолын улмаш! Тидын нерген йоча-влаклан үжмö уна Лидия Ивановна Савченко каласкален. Тудо кодшо курымын 60-70-шо ийлаштыже почтальонлан пашам ыштен. Веденевск ялыште чöчкыдын лиеден.

Ял йомын. Чонлан нелын чучеш. Эртыме корным лач йолгорно ушештара.

*Элвира СТЕПАНОВА.
Советский, Михайловка.
Фотом школ архив гыч налме.*

Онарын мландыже

Мый Марий кундемем дене кугешнем да тудым «Онарын мландыже» манам. «Молан Онарын?» манын йодыда гын, кугешнен каласем: Онар – марий калыкын ик эн патыр да виан талешкыже.

Мыйын Токтарсола кундемемат Онар дене кылдалтын: Онар пöя, Онар лумеш школ, колхоз, стеле. Тунг уремыште Д.И.Онарын лумжым нумалше школ торашке волгалтеш. Даниил Ильич кугу капан, виан, патыр, ушан да таза лийын. Телым ял воктене верланыше пöяште капшым шуарен, ече денат талын коштын. Эше тудым калык поро пашаж дене шарна. Онар ял калыкым тарватен да чодыраште пырням ямдылен, у школым нöлташ негызым пыштен. Тиде школышто тудын пелашыже да кок

эргыже туныктышылан пашам ыштеныт, а шкеже школ вуйлатыше лийын. Тудым курымеш шарнаш манын, коло кок ий ончыч школлан Онарын лумжым пуымо.

Тудын поро пашажым эргыже Геннадий Данилович умбакыже шуэн. Москосо геодезий институтым тунем лекмеке, метром чонгымаште инженерлан пашам ыштен. Кугу Ачамланде сар деч вара ешыж дене Токтарсолаш пöртылын, верысе школышто математикым туньктын. Тудын ойжо да проектше почеш кугу пöя ышталтын. Тудым «Онар пöя» манаш тунгалыныт.

Ялыш пурымаште «Онар-Токтар» шарнымаш стелым верандыме. Тудо уна-влакым шкеж деке үжеш.

*Родион НЕБОГАТИКОВ.
У Торъял округ.*

Коркан курык

Мый Кокласолаште илем. Ялем воктенак курык уло. Тудым Коркан курык маньт. Ойлат, пуйто ожно ялыште Корка луман патыр илен. Мландым, калыкым тушман деч арален. Тушман кушеч толмым палаш манын, курыкыш күзен ул-

маш. Чонгата гыч пеш мундыркö коеш. Патырын калымыкыже, курыклан тудын лумжым пуэныт. Курык воктенак ото уло. Тудо кумалме верлан шотлалтеш.

*Ангелина ТИМОФЕЕВА.
Морко район.*

Коран!



Йоча-влак коклаште икте-весым шылталымаш, игылтмаш, лұдык-тылмаш, эсогыл перен колтымаш вашлиялтят. Мутем «буллинг» нерген. Тудым икмыняр түрлылан пайлат. Мыскылымаш ден воштылмашым **вербальный** манит. Перен колтымаш, иктаж арверым, вургемым локтылмо **физический-лан** шотлалтеш. Пырля модмо тўшка гыч поктымаш, мутланымым чарнымаш, манеш-манешым колтымаш – **социальный**. Кызыт кибербуллинг улмымат палемдат. Тыгодым интернет гоч мыскыл-тышыш лукташ тыршат. А кў тидым ышта, пален налаш йўсў. Садлан ешартыш лұдыкшў шочеш.

Йодышлан уло вашмут

Йоча-влак коклаште ваш шы-дешкымаш молан тарвана? Тудын ваштареш кузе шогыман? Тидын шотышто Калыккан психолого-педагогический да социал-полышым пуышо «Доверие» республикысе рўдерын педагог-психолого Л.Ф.Ковалёва (снимкыште) дене мутым вашталтышна.

– Людмила Фёдоровна, ты окўл паша могай ийготан-влак коклаште чўккыдынрак вашлиялтеш?

– Ты томаша школ деч ончычат лийын кертеш гынат, утларакше 8-11 ияш йоча-влак коклаште ви-янеш. Рвезе-шамыч коклаште кучедалмаш ешаралтеш, ўдыр-влак мыскылаш, манеш-манешым кол-тылаш кумыланрак улыт. Тўнал-

тыш класс гыч кугуракыш кусны-мо, школым вашталтыме годымат тыгай лұдыкшў уло.

– Икшывым игылтеш гын, ача-авалан кузе лийман?

– Йоча дене кажне кечын мутла-ныман. Кумылжо нерген йодышт-ман. Эртыше кечын эн сылне да ойган таттым рашемдыман. Тур-гыжланымжым шотыш огыда нал гын, йоча тетла тыланда чон-жым ок поч.

Кугыен-влаклан поснак тўткў лийман. «Шке титакан улат», – ма-нын вурсыман огыл. Жап эртыме-ке, чыла мондалтеш манын, шотыш налде кодыман огыл. Игылтше йо-чан ача-аваж дене вашлийын мут-ланыман. Ты азапым сенген лекме йўным пырля кычалман.

Йоча-влаклан гын, теве мом шарныман:

✉ Игылтше дене ўчашыман огыл. Коран кайыман, йодышым пуэдыман але мутшо дене кел-шыман.

✉ Кугыенлан ээнертыман. Ты-годым вуйым шийман огыл, мо да кузе лиймым умылтарыман.

Йоча чоным лыпландарыше психологий приём-влак улыт. Мутлан, тушманым сўретлыман, вара ты кагазым уло шыде дене кушкед кышкыман. Шарикыш чурийым сўретлыман да тудым чумыман, пудештарыман. Ой-канаш торжан чучеш гынат, шы-дым лукташ тиде эн сай йўн.

– Йоча – поро чонан айдеме. Ну-нын коклаште уда койыш тўнал-тышым кушеч налеш?

– Лидер койышан йоча ончыл-но лияш вес йўным ок му гын, буллериш савырнен кертеш. Вес амал – ешыште еным «шкемын-лан» да «йотлан» шотлымаш. Ньюга тидым вигак шижеш да шке йолташыжым аклаш, а ве-сым мыскылаш тунемеш. Еным умылен, чаманен моштыдымаш, пешкыде чонан улмат ты корныш шогалтат. А шукыж годым мыс-кылыше шкежат лўдшў. Тыгай йочаланат специалистын полы-шыжо кўлеш.

– Икте игылтеш, весе чыта... Ала-кў кумшо ончен шога... Ты-гай сўретат вашлиялтеш.



– Шке ийготан-влак коклаште полыш уло гын, ўчашымым, мыс-кылымым да кучедалмым вашке чарнат. Шукын чаманат гынат, арален налаш лўдыт. А ок кўл пашаште полшышо йоча пушкы-до койышан. Мом ойлат, тудым ышташ ямде. Ответственностьюм ок шиж.

– Буллингым чытен лекмаш ўмырешлан кышам кода, очыни?

– Тыге. Айдеме шкем аклы-мым чарна. Сыныштыже, койы-шыштыжо ситыдымашым кыча-леш. Енлан ўшаным йомдара. Шке кумылжым шылташ тўна-леш. Шўм кўэмалтеш. Иммуни-тет начарештеш, чер вашке пи-жеш. Омо, аппетит пужлат.

Кугыен-влак, полышым йодшо йочам ўрдыжеш ида кодо! Ик-те-весе коклаште буллинг улмым шекланенда гын, коклаш пурыза.

Шотыш налза

Йочан туткарыш логалмыжым теве кузе шекланаш лиеш:

✦ Вучыдым мўшкыржў, онжо коршат.

✦ Школыш каяш торешлана, трукушто тунеммаште волен кая.

✦ Нервный тик але энурез витара.

✦ Шўлыккан, тургыжланыше лиеш.

✦ Йўсын мала, шучко омо конча.

✦ Пеш кужу жап йокроклана.

✦ Чўккыдын черланаш тўналеш.

✦ Шкет кодаш тырша, мутла-нымыже ок шу.

✦ Аппетитше уке.

✦ Шкенжым ончычсо деч шек-ланенрак, лұдыкшынрак куча.

Оля МАЙКОВА ямдылен.
Фотом еш архив гыч налме.



Педагогике науко кандидат, Россий Федераций общий образованийын почётан пашаенже, Марий Эл Республикысе образованийын сулло пашаенже, Йошкар-Оласе 21-ше номеран Семёновка школышто туныктышо
О.Н.ВАСЕНИНА
ямдылен.

«Шочмо элым аралышын кечыже» урок

1 Текстым лудса да рушлашке кусарыза. Тиде ойлончым текстыште муза: «Это государственный праздник, который чествует представителей Вооруженных Сил и других силовых структур, обеспечивающих безопасность страны».

Ачамландым аралышын кечыже – ий еда 23 февральыште палемдалтше пайрем. Тўналтыште тудым Йошкар Армийын кечыже маныныт, 1946 ий гыч – Совет Армийын кечыже, варажым – Совет Армий ден Сарзе-тенгыз флотын кечышт. Шочмо элым аралышын кечыже семын тудым 1995 ий гыч палемдена. Тиде кугыжаныш пайрем, тудо элнан лўдыкшыдымылыкшым аралыше Сарзе вийын да моло структурын енгыштым чапландара. 23 февральыште парад да военный техникым ончыктымаш-влак эртаралтыт. Тыгак тиде кечын палыдыме салтакын шўгарже, Курымашлык тул але военный мемориал деке пеледышым пыштат.

2 Муткылдыш-влакым шарныза. Нуным кўшыл текстыште муза.

Сарзе вий – Вооруженные Силы, Йошкар Армийын кечыже – День Красной Армии, Совет Армийын кечыже – День Советской Армии, Сарзе-тенгыз флотын кечыже – День военно-морского флота, Ачамландым аралышын кечыже – День защитника Отечества.

4 Темлыме мут-влакым кучылтын, калыкмутым чогыза да марлангыза.

1) за герой горой Родину –

2) служить жить Родине –

3) свято солдата честь береги –

4) и смел сел тот коня на кто –

5) в ученье легко тяжело бою в –

6 Шочмо элым аралышым пайрем дене саламлыза.



3 Ойлончо ужаш-влакым чын ушыза.

Ольга Тихомирова
Кугу Ачамланде сарыш
Тудо Белорус мландыште
Ольга
1943 ийыште кугу
Тиде кредалмаште

партизан отрядыште кредалын.
Ольга колен.
медшўжар лийын.
шке кумылын каен.
Лапшино ялеш шочын.
кредалмаш лийын.

5 Шочмо элнан кугу полководецше-влакын сенгымашышт дене палыме лийза. Нунын лўмыштым шола могыр текст дене чын ушыза.

Тиде XIII курымышто лийын. Руш мландым Новгородысо князь арален. Неле жапыште шке йырже калыкым ушен да Европысо рыцарь-влакым пуртен огыл. Тиде сўй Ий кредалмаш лўмым налын.	Дмитрий Донской
1380 ийыште полководец шке войскаж дене Куликово пасушто татар-монгол игым кырен шалатен. Тудын кугезе уныкаже Иван III Москон кид йымалныже улшо шуко руш мландым иктыш ушен, нуным татар-монгол-влак деч пўтынек утарен. Тыге элнан историйыштыже у тат – Моско кугыжанышын жапше – тўналын.	Александр Суворов
Ты полководец 1812 ийысе Ачамланде сарыште чапланен. Тудым салтак-влак пагаленыт, пўтынь Россий ўшанен. Бородино воктене кредалмаш Ачамланде сарыште тура савыртыш лийын.	Александр Невский
XVIII курымышто салтаклан служитлаш тўналын да генералиссимус марте кушкын. Ёмыр мучкыжо ик кредалмаштат сеналтын огыл. Тудын салтакше-влак турко Измаил орым штурм дене налыныт. Италийыште француз-влакым кырен шалатеныт. Шке армийжым авыралтмаш гыч утарен, Альпе курык-влакын перевалышт гоч луктын.	Михаил Кутузов



Полышым шижышт

Школыштына специальный сарзе операцийште улшо салтак-влаклан гуманитарный полышым погымо акцийым эрта-рыме. Тушко тунемше, ача-ава да туныктышо-влак ушненыт. Меат, 1-ше номеран Морко школышто 4-ше «А» классыште тунемше-влак (снимкыште), орды-

жеш кодын огынал. Кочкишым, гигиене арверым, эм-влакым да молымат погымо. Элнан эрык-шым аралыше талешке-влак, посылкынам налын, шочмо кундем гыч полышым шижышт.

Софья НИКИТИНА.
Морко посёлко.

Фотом школ архив гыч налме.

• Калыкмут •

- ❖ Калык вий – кугу вий.
- ❖ Калыкым йоратет гын, калыкат тыйым пагала.
- ❖ Калыкыште чылажат уло.

• Мастер кид •

Книга лукышто – янлык

Книга коклашке пышташ ятыр тасма уло. Фотосо гай увавам, рывыжым да чывыгым түрлө тусан кагаз гыч тодыштман. Шинчам, нерым, чапам ончылгоч пүчкедыман але сүретлыман. QR-кодым ончен, закладкым ямдылыза.



Таум каласат

Йүштö теле чылалан лүдык-шым конда. Садлан авам ден коктын кормушкым келыштарен сагышна. Ынде кайык-влакым кажне кечын куанен пукшем (снимкыште). Тыге нуно мыланем таумутым каласат.

Алексей НИКИФОРОВ.
Волжский, Пётъял.

Фотом вш архив гыч налме.

Шкетан театр
Искусство полшпа
СВО-лан полшмо шотан спектакль

21 февраль 16:00
В. Розов
ЧОНЕШТА ТУРНЯ КАШТА
Драма

22 февраль 16:00
А. Рошалева, С. Тимонина
КАВАСЕ АЛАША
Музыкальный комедия

Билетым ужалыме окса
Марий Эл гыч СВО-што улшо-влаклан
Рекламе. пошпаш кая

shketan.ru



0+

Марий Эл Республикысе
«Марий Эл»
увер агентстве» КАУ.
Директор –
Е.И.КУЗНЕЦОВ.
Тун редактор –
А.Н.ГРИГОРЬЕВА.

Индекс П4696.
Тираж 1500 экз.
Заказ
Формат – А-4-8.

Учредитель-влак:
Марий Эл Республикысе Тувара,
печать да калык-влакын пашашт
шотышто министерстве,
Марий Эл Республикысе
«Марий Эл» увер агентстве» КАУ.

Редакций да издатель: Марий Эл
Республикысе «Марий Эл»
увер агентстве» КАУ,
424006, Йошкар-Ола,
СССР Вооружённый Вийын 70-ше
идалькыш урем, 20-шо порт.
Тел. 8(8362) 45-22-82.

Газетым редакцийште
погымо да верстатлыме,
«Марий Эл Республикысе
Правительствын
типографийже» ООО-што
ямде оригинал-макет гыч
савыктыме.
Типографийын адресше:
424000, Йошкар-Ола,
Комсомольский урем, 112.

Печатьыш пумы жап –
14-00, фактически – 13-00.

Авторын да редакцийын
шонымашышт түрлө лийын кертят.
Серыш-влак мөнгеш огыт колталт.
Ак – кутырен келшыме почеш.

https://vk.com/yamde_lii
<https://t.me/yamdelii>
yamde_lii@mail.ru
yamdelii@mediamari.ru
(автор-влаклан)
Сайтын адресше: ямделий.рф

Газетым Кыл, информационный
технологий да массовый
коммуникаций сферым
эскерыме шотышто
федеральный службыв Юл кун-
дем федеральный округысо
управленийыштыже
регистрироватлыме.
Номер – ПИ № ТУ52-01404,
2023 ий 22 сентябрьыште пумы.

У конкурс



Изи, да туш

Мыланем марла мураш, кушташ да түрлө кидпашам ышташ келша. У ий вашеш школышто конкурсум увтареныт ыле. Уло кумылын уш-ненам. Кок номинаций лийын: «У ий кож» ден «У ий модыш». Мый Лумұдыр гай сылне тувыран кожым ыштенам. Весыжым лум мөчөрым келыштаренам. Эше мыланем номеран сүретым сүретлаш келша. Крым Республикысе лаванде пасум сүретленам. Ийготем изирак гынат, кид-мастар улам манын шонем.

Вера НИКУЛИНА.
Йошкар-Ола.



Тимур ИЛЛАРИОНОВ.
Морко, Коркатово.

Уш-акылет терге.

14 февральыште Марий АССР-ын калык поэты Геннадий Матюковскийын шочмыжлан – 100 ий.

1. Г.И.Матюковскийын чын фамилийже могай?
2. Тудо кушан шочын-кушкын?
3. Поэтын икымше сборникше могай лийын?
4. Ш.Булатлан, П.Першутлан да Йыван Кырлалан пөлеклалтше поэмыжым кузе лүмден?
5. Геннадий Ивановичын почеламутан романжын лүмжым каласыза.
6. Г.И.Матюковский икымше марий оперылан либреттым возышо-влак кокла гыч ик авторжылан шотлалтеш. Оперын лүмжө могай?
7. Калык поэтын сылнымутшым могай йылмылашке кусарыме?

Людмила НИКОЛАЕВА ямдылен.



Келшыше ўмылым муза.



«Смешарики» мультфильм гыч Кроликын лүмжым палыза.



Алексей ТИМОФЕЕВЫН
сүретше.
Волжский, Сотнур.

Сүретым ончен, цифр-влакым ушыза да чиялтыза.

